

आकाशवाणी जयपुर—अजमेर

प्रादेशिक समाचार

दिनांक 31.03.2025 समय: 18.45 बजे

- मुख्यमंत्री भजन लाल शर्मा कह्यो— राजस्थान ने ठावां निवेश री ठौड़ बणावण सारू दूरगामी फ़ैसला लिया जावें
- देशभर मांय आज ईद—उल—फितर रो तियांर धार्मिक सिरधा अर उमाव रे साथे मनायो जावें
- लोकपर्व गणगौर रो तियांर प्रदेशभर मांय रीत मुजब सिरधा भाव रे साथे मनायी ज्यो
- राज्य रा सरकारी अस्पतालां मांय काले ऊं ओ.पी.डी. रा बगत मांय बदलाव—संवारां 8 बज्यां ऊं 2 बज्यां ताई संचालित व्हेला आउट डोर सेवां

000

राजस्थान दिवस साप्ताहिक महोत्सव रे तैत आज जयपुर मांय राज्य थर रो निवेश उत्सव राईजिंग राजस्थान इम्पेक्ट 1.0 रो आयोजन करी ज्यो उत्सव मांय बोलता मुख्यमंत्री भजन लाल शर्मा कह्यो के आज रो निवेश उत्सव एक महताऊ माइलस्टोन इम्पैक्ट 1.0 माथे केन्द्रित है, जो राइजिंग राजस्थान ग्लोबल इन्वेस्टमेंट समिट रे तैत करी ज्या एम.ओ.यू. ने धरती माथे उतारण री आपा री कोशिशों ने दरसावे हैं वणा कह्यो के राज्य सरकार आं निवेश प्रस्तावां ने धरा माथे उतारण सारू हर महकमां अर जिला मांय डेडिकेटेड टीम बणायी है, जो इण एम.ओ.यू. री सक्रिय रूप ऊं निगराणी कर री हैं श्री शर्मा कह्यो के आ कोशिशों रो ई नतीजो है के राइजिंग राजस्थान रे तैत व्हा एम.ओ.यू. मांय ऊं 3 लाख करोड़ रिप्यां री परियोजनावां री ग्राउंड ब्रेकिंग व्हे री हैं वणा कह्यो के ओ उत्सव राज्य रा आर्थिक विकास री दिशा मांय एक महताऊ कदम साबित व्हेलां

.....
उत्सव रे दौरान मुख्यमंत्री ऐलाण कर्यो के 30 अप्रैल ताई एम.ओ.यू. करण वाळां निवेशकां सारू 15 मई ताई खास पोर्टल री मार्फत जमी आवंटन री सुविधा दी जायेलां साथे ही वणा राजस्थान फाउण्डेशन रा 14 नुवां चैप्टर खोलण रो ई ऐलाण कर्यो मुख्यमंत्री कह्यो के आपां पांच सालां मांय सरकारी हलका मांय 4 लाख अर निजी हलका मांय 6 लाख रोजगार रा मौका ई बणाया जायेलां वणा कह्यो के ई बरस 11 अर 12 दिसम्बर ने दो दिन रो राइजिंग राजस्थान पार्टनशिप कॉन्क्लेव ई व्हेलां कार्यक्रम मांय मुख्यमंत्री ऑनलाइन इन्वेस्टर इंटरफेस रो मोबाइल ऐप ई लॉन्च कर्यो उत्सव मांय बोलतां उद्योग मंत्री कर्नल राज्यवर्धन सिंह राठौड़ कह्यो के राज्य सरकार प्रदेश मांय निवेश ने बधावो देवण सारू बरोबर फ़ैसला लेय री है जिण ऊं साल 2047 ताई विकसित राजस्थान रा संकल्प ने पूरो कर्यो जा सकें

.....
प्रदेश रा न्यारा—न्यारा जिलां ऊं कलेक्टर अर न्यारा—न्यारा महकमां रा अहलकार ई राज्य थर रा निवेश उत्सव मांय वर्चुअल जुड्यां

000

वित्त मंत्री निर्मला सीतारामन काल नुवी दिल्ली मांय "नीति छंन्त राज्य आर्थिक मंच" पोर्टल री सरूआत करेलां राष्ट्रीय अनुप्रयुक्त आर्थिक अनुसंधान परिषद- एनसीईआर री मदद ऊं नीति आयोग ई पोर्टल ने विकसित कर्या हैं ओ पोर्टल 1990-91 ऊं 2022-23 तांई कोई 30 साल रा बगत सारू सामाजिक, आर्थिक अर राजकोषीय मापदंडां, शोध रपटां, कागदां अर राज्य वित्त माथे जाणकारां री टिप्पणियां रा आंकड़ां रो मोटा भण्डार हैं

000

ईद-उल-फितर आज देशभर मांय रीत मुजब उमाव रे साथे मनायो जावें ई मौके ईदगाहां अर मस्जिदां मांय ईद री नमाज अदा करी ज्यीं राष्ट्रपति अर उप-राष्ट्रपति ईद री शुभकामनावां दी हैं प्रधानमंत्री नरेन्द्र मोदी ई ईद-उल-फितर माथे देशवासियां ने शुभकामनावां देवता एक सोशल मीडिया पोस्ट मांय आस जतायी की ओ तिवारं समाज मांय आशा, सद्भाव अर दयालुता री भावना ने बधावेलां वणा सगळां री कोशिश मांय खुशी अर कामयाबी री कामना करीं राज्यपाल हरिभाऊ बागडे ईद-उल-फितर रे मौके प्रदेशवासियां ने बधाई अर शुभकामनावां दी हैं अठिने राजधानी जयपुर समेत प्रदेशभर मांय ईद री खास नमाज रे मौके घणी तादाद मांय अकीदतमंद जुट्यां ई सारू मस्जिदां मांय सोवणी रोशनी अर सजावज करी ज्यीं हैं ईद ने ले र बाजार ई गुलजार रियां लोग देर रात तोई ईद री खरीदारी करता निजर आयां आज घर-घर खीर अर सेवईयां बणायी ज्यीं जोधपुर मांय जालोरी गेट री बड़ी ईदगाह मांय हजारू लोगां ईद री नमाज अदा करीं नमाज रे पछे लोगां गळे मिल ने एक-दूजा ने बधाई दीं अजमेर मांय खास नमाज केसरगंज ईदगाह मांय व्हीं ख्वाजा मोइनुद्दीन हसन चिश्ती री दरगाह री शाहजहानी मस्जिद मांय ई नमाज अदा करी ज्यीं ई मौके दरगाह रो जन्नती दरुजो खोली ज्यो, जठे जायरीन जियारत कर ने दुवावां मांगीं झालावाड़, सीकर, बाडमेर, बारां, चूरू, डूंगरपुर अर पाली मांय ई ईद-उल-फितर अकीदत अर एहतराम रे साथे मनायी ज्यीं

000

प्रदेशभर मांय आज रित मुजब सिरधा भाव ऊं गणगौर रो तिवारं मनायो जावें होळी ऊं सरू व्हयो ईसर गणगौर रा पूजन रो सिलसिलो आज पूरो व्हयो पूजा रे पछे तळाब, सरोवरां अर बावडियां मांय मंगल गीतां रे साथे गणगौर मूरता रो विसर्जन करी ज्यो सुख अर सौभाग्य ऊं जुड्या लोकपर्व माथे राजधानी जयपुर मांय आज गणगौर री रित मुजब शाही सवारी निकाळी जावें उठिने उदयपुर मांय गणगौर फेस्टिवल मनायो जावें ओ उत्सव तीन दिन तांई चालेलां गणगौर घाट माथे ईसर-पार्वती री पूजा-अर्चना करी जावें सिंज्यां घंटाघर ऊं गणगौर घाट तांई गणगौर री सवारी निकाळी जायेलां इण रे पछे सांस्कृतिक कार्यक्रम व्हेलां जोधपुर मांय ई गणगौर रो तिवारं धूमधाम ऊं मनायो जावें पोकरण मांय आज गणगौर पर्व माथे मेळो भरीजें झालावाड़ मांय ई गणगौर रो तिवारं रीत मुजब उमाव रे साथे मनायी ज्यो पाली मांय गणगौर मेळो भरीजें दौसा मांय नगर परिषद कानी ऊं गणगौर री सवारी निकाळी ज्यी जो खास मार्गां ऊं व्हे र निकळीं राज्य रा भरतपुर, बाडमेर, बारां, चूरू, सवाईमाधोपुर अर हनुमानगढ़ जिलां मांय ई गणगौर रो तिवारं सिरधा अर हरक रे साथे मनायो जावें

000

राज्य मांय न्यारी-न्यारी ठौड़ां नवरात्रां रे दौरान मिन्दरां अर घरां मांय पूजा-आराधना रो दौर चालें वठे ई केई ठौड़ां मेळा ई भरीजें जैसलमेर रा रामदेवरा मांय आज चैत्र म्हीना रा शुक्ल पक्ष री दूज रे मौके बाबा रामदेव री समाधि रा दर्शन करण सारू सिरधालूआं रो तांतो लाग्यो हैं संवारां ऊं ई बाबा रामदेव समाधि ठौड़ रा प्रवेश द्वार खोल दीरीज्या हां समाधि माथे पंचामृत ऊं खास अभिषेक करी ज्यो

000

प्रदेश रा सरकारी अस्पतालां मांय आउट डोर रो बगत काले ऊं बदल जायेलां जयपुर रा सवाई मानसिंह अस्पताल अर उण ऊं जुड्या अस्पतालां समेत सगळा जिला अस्पताल, उपजिला, सैटेलाइट, सामुदायिक स्वास्थ्य केंद्र अर प्राथमिक स्वास्थ्य केंद्र अबे संवारां 8 बज्यां ऊं दोपरां 2

बज्यां ताई ओ.पी.डी. सारू खुल्ला रहवेलां स्वास्थ्य महकमो सगळा जिलां रा स्वास्थ्य अहलकारां ने मरीजां ने गर्मी ऊं आराम देवण सारू वाजिब बन्दोवस्त करण रा निर्देश दिया हैं अस्पतालां मांय ओ.पी.डी. अर आई.पी.डी. वार्डां मांय कूलर, पंखां, एसी अर साफ पीवण रा पाणी रा इन्तजाम तैय करण ने कह्यो हैं

000

प्रदेश मांय उत्तराद हवा रा असर ऊं सांझ-संवारां हल्की ठण्ड रो असर बण्योड़ो हैं मौसम महकमां मुजब काले ताई उत्तराद हवा रो असर रहवेला अर तापमान सामान्य ऊं कम रहवेलां मेहकमां मुजब राज्य रा दिखणाद अगूणी हलका मांय आज ऊं तीन अप्रैल ताई बादळ छाया रहवेला अर जयपुर, अजमेर, उदयपुर अर कोटा संभागां मांय कठे-कठे मेघगर्जन रे साथे हल्की बिरखा होवण री आस हैं 3 ऊं 4 अप्रैल ने दिखणाद आथूणी राजस्थान मांय बत्ती रा तापमान मांय 2 ऊं 3 डिग्री सेल्सियस ताई री बढवार होवण री आस हैं लारला 24 घंटा रे दौरान प्रदेश मांय सब ऊं बत्ती 37 दशमलव 4 डिग्री सेल्सियस तापमान बाड़मेर मांय दर्ज करी ज्यों चित्तौड़गढ़ मांय 37 दशमलव 2, कोटा मांय 36, सीकर मांय 32, पिलानी मांय 35, अजमेर मांय 33 दशमलव 6 अर राजधानी जयपुर मांय बत्ती रो तापमान 33 दशमलव 8 डिग्री सेल्सियस दर्ज करी ज्यों

000

पैली री केंद्रीय मंत्री डॉ. गिरिजा व्यास आज सवारां उदयपुर मांय नवरात्रि री पूजा रे दौरान साड़ी मांय आग लागण ऊं झुळस गयीं इण माथे वां ने अस्पताल ले जायी ज्या जठे ऊं प्राथमिक ईलाज रे पछे वां ने अहमदाबाद रैफर करी ज्या हैं जानकारी मुजब वे आप रा रहवास माथे सवारां नवरात्रि पूजा कर री ही ई दौरान वां री साड़ी मांय आग लागण ऊं ओ हादसो व्ह्यो

000

भारतीय टेनिस खिलाड़ी युकी भांबरी ए.टी.पी. डबल्स रैंकिंग मांय ठावां 30 मांय भेळा व्हे गया हैं वणा आप रा करियर री सब ऊं ऊंची रैंकिंग हासिल करी हैं वे भारत रा नंबर एक डबल्स खिलाड़ी ई बण गया हैं यूकी भांबरी रोहन बोपन्ना रा ई साढ़े पांच साल ऊं ठावी ठौड़ मांय थे बणया रहवण रा रिकॉर्ड ने तोड़ दिया हैं बोपन्ना अबे 44वी ठौड़ माथे आय गया हैं

000